

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Thingtlanga kuthnathawktu hmeichhiate tharchhuah zawrhna SARAS Fair vawi – 11-na leh SHG Mela SARAS FAIR leh SHG MELA 2025 ah ni 4 chhungin cheng nuai 54, sing 3, sang 5 chuang man hralh chhuah a ni.
- 2. Aizawl Zoological Park atanga sava chi khat, Pesquet's Parrot bo chu thenawm state Assam leh Meghalaya bakah Wildlife Crime Control Bureau thuneitute puihna nen ngawrh taka zawn chhunzawm mek a ni.
- 3. Chief Minister Pu Lalduhoma leh Adviser to CM Dr Lorrain Lalpekliana Chinzah te'n Model Code of Conduct an bawhchhia nia puhna chungchangah an insawifiah tawh a, hmalak zel dan tur ngaihtuah mek a ni.
- 4. Prime Minister Narendra Modia chuan sawrkarin ram changkang siam turin state changkang siam thupuihah a nei tih a sawi.

<><><>

SARAS FAIR

Thingtlanga kuthnathawktu hmeichhiate tharchhuah zawrhna SARAS Fair vawi – 11-na leh SHG Mela SARAS FAIR leh SHG MELA 2025 chu zanin hian a tawp tawh dawn a, ni 4 chhungin cheng nuai 54, sing 3, sang 5 chuang man hralh chhuah a ni.

Akashvani News Aizawl zawhna chhangin, DAY-NULM Manager Gudhi Singh chuan Urban leh Rural an inthen hrang tih sawiin, Urban chuan District 11 huamin Thawhlelni atanga SARAS FAIR leh SHG MELA 2025 an neih chhung hian an in hralh tha hle a ti a, a hawn ni khan Urban area atanga thil zuarte chuan cheng nuai 3, sing 8, sang 5 man an hralh a, a tuk Nilainiah cheng nuai 5, sing 5 man hralh lehin, Ningani khan cheng nuai sing 7, sang 4 chuang man an hralh leh a, nimin kha an hralh tam ber ni niin cheng nuai 10, sing 1, sang 3 man an hralh tih sawiin, vawin lam pawh a khar ni a nih bakah chawlh a ni a, concert te a awm dawn bawk avangin mipui an tam tih sawiin zanin dar 9 leh a chanve velah chuan vawin lama an hralh chhuah zat pawh an hriat theih a rin tawh thu a sawi a ni.

Byte : DAY-NULM Manager Gudhi Singh

MzSRLM CEO Pi Zosangzuali Pachuau chuan thingtlang khaw hrang hrang 71 atanga nu 98 te chuan stall 52 hawngin an thil siamchhuah leh an thar chhuah te an zuar a, an rin phakbak a an inhralh that thu sawiin mi tam tak tan hlawkna a thlen

dawn a ti a, Lungleiah pawh SARAS buatsaih leh an tum mek tih sawiin mipuite chu hlut sak leh turin a sawm a ni.

Byte: MzSRLM CEO Pi Zosangzuali Pachuau

Kumina a vawi 11-na atan Lammual Ground, Aizawlah UD&PA nena tangkawpin, MzSRLM leh MzSULM hnuai a SHG te ten SARAS Fair & SHG Mela an buatsaihah hian hian Stall – 102 bakah Food Stall- 8 buatsaih a ni a. Heng zingah hian MzSRLM hnuai Block 28 chhung a khaw 71 atangin SHG member 98 ten Stall-52 leh Food Stall-2 an nei a ni.

<><><>

SARAS FAIR & SHG MELA

Ni 5 awh Aizawl Lammuala SARAS Fair & SHG Mela a an thilsiam chhuah phochhuaktu nuho in an hlawkpui thu an sawi.

Akashvani Palai zawhna chhangin he fair-a dawr nghaktu nuhote chuan UD&PA nena tangkawpin, MzSRLM leh MzSULM hnuai SHG te tana SARAS Fair & SHG Mela an buatsaih chu tha an tiin an hlawkpui hle an ti a, Champhai atanga Dorothy SHG hminga lo kal Pi Laltansangi chuan he fair hi a mimal takin an hlawkpui hle tih sawiin, nimin ringawtah pawh cheng sing 3 chuang man an hralh tih a sawi a, hei bakah hian thingtlang (Rural) leh khawpui (Urban) a SHG member thilsiam te a khaikhin a, an thil siamchhuah leh thar chhuah te chu tha tlang a tih thu sawiin, chona thar a pek thu a sawi a ni.

Reiek RD block atanga kal Pi Mami chuan an thil siamchhuah te chu Reiek tourist gate bul leh Ngaitlang bul velah an zawrh thin thu leh eizawna atana an hman ber a ni tih sawiin, SARAS Fair hi an chhawr hle a, in hralhchhuah pawh a nuam tih sawiin, ni khatah cheng sing 2 man vel an hralh chhuak ziah niin a sawi. Stalls hrang hrang nghaktu Nu ho te pawhin sorkarin hetiang programme a siamsak hi tha an tih thu leh mipuiten an hlut sak chu an lawm hle tih an sawi a ni.

<><><>

EXOTIC BIRD

Aizawl Zoological Park atanga sava chi khat, Pesquet's Parrot bo chu thenawm state Assam leh Meghalaya bakah Wildlife Crime Control Bureau thuneitute puihna nen ngawrh taka zawn chhunzawm mek a ni.

Deputy Conservator of Forests Aizawl Wildlife Division in Nilaini a thuchhuah a siamah chuan Dan lova Exotic Bird (Pesquet’s Parrot) tawlh ruk man, nakum February thlaa Aizawl Zoological Park (Sahuan) a dah luh chu October ni 29, Nilaini zing dar 8:35 ah rukbo a ni tih hriat a ni a, rukbo hun chu ni 28.10.2025 tlai lam dar 4:00 atanga ni 29.10 2025 zing lam dar 7:00 inkar nia hriat a nih thu leh Sairang Police Station ah FIR thehluh nghal a nih thu sawiin, he thil thleng hi department lam pawhin an chhui zui mek a, thilsual ti tute man chhuah theihna khawp information pe theitute hnenah “The Mizoram Rewards for Detection of Forest and Wildlife Offence Scheme 2019” in a phal angin lawmman cheng sing 2 pek an ni dawn a, an nihna (identity) thupsak tlat an ni dawn bawk tih a sawi a ni.

Hemi chungchanga Akashvani News Aizawl zawhna chhangin, Deputy Conservator of Forests Aizawl Wildlife Division leh Aizawl Zoological Park

Director Pi Margaret Lalramchhani chuan Pesquet's Parrot chu dan lova tawlhruk niin Champhaia an man hnuah Magistrate order angin nikum February khan Aizawl Zoological Park ah dah a ni a ti a, he sava hi enclosure thar berah an dah a, a chain link pawh a la tuiek loh avangin amaha a thlawh chhuah an rin loh thu a sawi a ni.

Byte : Pi Margaret Lalramchhani

Aizawl Zoological Park, ah hian ramsa 300 chuang an awm mek a, heng zinga engemawzat chu bo tawhin, tun thlengin hmuh let a la awm lo ni lo a, hetiang thil sahuana a thlen tawpna a nih ngei theih nan theihtawp chhuah mek a ni a, tunhnaia thil thleng avang hian sahan staff te chu duty hun insiamin a inchhawka tlaivara duty nghal a ni tih Deputy Conservator of Forests Aizawl Wildlife Division chuan a sawi.



MCC VIOLATION

Dampa Bial by-election lo awm tura Chief Minister Pu Lalduhoma leh Adviser to Chief Minister Dr Lorrain Lalpeklana Chinzah te’n Model Code of Conduct an bawhchhia nia puhna ah an in sawifiah tawh a, hmalak zel dan tur ngaihtuah mek a ni.

Akashvani News Aizawl zawhna chhangin Dampa bial by election lo awm tura Returning Officer, MCC Nodal Officer ni bawk Pu Malsawmzuala chuan karkalta Zirtawpnia MNF Legal Board hnen atanga Chief Minister Pu Lalduhoma leh Adviser to Chief Minister Dr Lorrain Lalpeklana Chinzah ten MCC an bawhchhia tih puhna an dawn chungchangah ZPM lam atanga insawifiahna an dawng tawh a, hmalak zel dan tur an ngaihtuah mek tih a sawi a ni.

Hetihlai hian AAP Mizoram chuan vawiin khan thuchhuah siamin, October ni 3-a PWD changtu Minister Pu Vanlalhlana’n Phuldungsei khuaa a campaign naah North East Special Infrastructure Development Scheme (NESIDS) hnuaiah Pukzing leh Silsury kawng, truck kal theihna a siam tura awm vek tawh, ZPM candidate Pu Vanlalsailova a tling lo a nih chuan ngaituah nawn a ngai leh tur anga sawi a, Dampa bial mipui te rilru a ti chi-ai chuan The representation of the People Act, 1951 leh The model code of conduct chiang takin a kalh an ti a, India Constitution hnuaia Article 19 (1) (a) a tiderthawng bawk tih sawiin, Election Commission of India hnenah hrem a nih ngei theih nan leh mipui a tithaih te thlang hauh nan nimin khan Deputy Chief Electoral Office Pu James Miahlung hnenah thubuai an theh lut tih an sawi a ni.

October ni 6 khan Election Commission of India (ECI) chuan Dampa Bial MLA by-election neih hun atan November 11, 2025-a ruat tih a puang a, model code of conduct hman zui nghal a ni.



CHHINGA VENG JOINT OPERATION

Chhing Veng Local Council leh NGO chuan vawiin khan an vengchhunga dan lo a sumdawng dapchhuah hnatlang neih chhunzawmin dan loa sumdawng mi 7 an man belh.

Chhing Veng Local Council leh Joint NGO hian thla liam ta October ni 18 atang khan dan loa an veng awm dapchhuah beihpui anlo thlak tawh a, hemi tuma an man te hi October thla ral hmaa an veng chhuahsan tur leh in chingfel tura thu pe in heng zinga mi pathum ten an dawr an titawp a, pakhatin dawr a lo la hawn avangin Tala-a kalhsak a ni.

Vawiin hnatlangah hian dan loa sumdawng mi 7 an man chhuah belh hi November ni 15, 2025 hmaa inthiar fihlim tura tih an ni.

Akashvani News Aizawl zawhna chhangin Chhing Veng Branch YMA President Pu C Laldinsanga chuan dan lova sumdawng tih rehna tura an hmalakna vengchhung thlawpna an hmu tha a ti a, an veng chhunga hnamdang sumdawngte chu state pawn lam atanga vai leh Myanmar atanga lo kal, pem lehkhah nei lote an ni a ti a, pem lehkhah nei te erawh chu sumdawn an phalsak tih a sawi a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

PM

Prime Minister Narendra Modia chuan sawrkarin ram changkang siam turin state changkang siam thupuihah a nei tih a sawi. Vawiina Chhatisgarh Legislative Assembly building thar a hawnnaah he thu hi sawiin Pu Modia chuan ram pumin hmasawn zawngin ke a pen rualin ram rohlu te vawnthat zel a ni a ti a. He thupui hi sawrkarin policy leh thutlukna a siamahte a lang chho zel tih a sawi a. Chhatisgarh Assembly building thar chu India hmathlir entirtu pakhat anih thu a sawi bawka ni.

Vawiin vek khan Prime Minister Modia hian Prime Minister hlui leh Bharat Ratna dawngtu Atal Bihari Vajpayee lim a tlangzarh bawka ni.

<><><>

PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawka ang.

<><><>